



TEZAUUR LITURGIC
5 DECEMBRIE

SLUJBA
SF.PREOT-MUCENIC
ILIE
CETVERUHN
DE LA
MOSCOVA



MOSCOVA, 2000



Служба сщмч. Илье Четверухину

На «Господи воззвах» – стихиры на 8, глас 2,
подобен «Егда от древа»:

Егда Николаю богобоязненну/ С высокородною
Мариєю супружницею/ Удвои Господь
благословение паки сына рождеством,/
Нарекают того огнепаляща пророка именем,/ Да
от силы возрастая в силу разумом,/ О учении и
богопознании первенствуя –/ Среде тьмы
неверствия и суемудрия/ Возвысит одинокий
исповедания глас// Богоизбранный Илия-отрок:
се – аз верую!

О науках внешних изрядствуя усердием,/
Чуткоблагочестивою душею внимая Промыслу,/
Обретаеши, о Илие, невесту благородну о жизни
и имени,/ О писаниях тя уязвляюще святых
отец,/ Да исправите общий путь вам на
духовныя стези,/ Да Варнавы преподобнаго
прозорливым вдохновением,/ Паки старца
Зосимовска благословением святым/
Единогласно от алтаря и клироса// Всею
жизнию славночестно воспоете: верую!

Се оставихом вся и по Тебе идохом, Господи, -/
Возглашает апостольски чета избранная/
Освятая дом, великий боголюбием,/ Яко

ангельским посещением исповедник будущих и мученик:/ Се удел благословенный во дворех у преподобнаго Сергия,/ Се – по образу отеческу молитвенно восхождение/ О терпении друг друга тягот крестоноснем/ К небосветлым вершинам смиренномудрия,// Любвию сияющих и совершенною верою.

Се покоя столп обрет пророчески жену всемудрую,/ На столпе истинне утверждаеши – Церкви Божией,/ О священнем ти Залогѣ апостольски ревнуя,/ Восприим же от Пастыреначальника благаго икономства дар,/ На служение первее послан всеисхождения,/ Богадельник искусен являешися измлада, о Илие,/ Немоцных врачуя, оскудение тех надежды восполняя милостию,/ В нюже сердце погрузив, обретаеши Всемиловитаго -// Якоже Сирианин Исаак учит – познаеши сие верою.

Егда удручена сиротством Толмачевска паства// Взыска детоводителя си ко Господу и отца,// Се добра тя избирает молитвенника и стража неусыпна.// Идеже бо яко ангел просия служением любезный ти старец,// Ныне - слова ревнителю, паки устава церковнаго -// Деннонощно блюдеши рабы Божия, не преклоншия колена// Яко Ваалу нову – хитростну духу расслабления.// Се же мзда Илии-пастыря – заточение Бутырок лютых, //

Несмущенным того исповеданием печатлеемо: аз верую!

Духом присно свободь сый, от темницы возвращаяся во своя, // Паче порабощаеши ся душ возделанию, Божий узниче Илие, // Братолюбным состраданием прерасширяя сердце, // В немже скорби ближних ти нетесно погружени, // Утоляются благодатию Христа-Господа, // Новую ти указующа жития стезю храма заключением, // По временнем утешении от собрата любоприимна, // На изгнание тя конечно Вседержавно благословляюща, // Лобызающу ти десницу Божию верую.

Сосыланием досязаеши края дебри Пермския, // Страданием крайним освященной новых мученик, // Се – и ти вверяется, Илие, тех крест сонести, // Се – от присных неволию удаляется супруг и отец, // Се – и пастырь от овец разлучен милости неведущими - // Но не весть изгнания всельник Божия земли: // Молитвою единяется с присными и паствою, // Паче же душу полагает о возлюбленных, // На Голгофу по Господе и святым восходит верую.

Удручен истощанием крайним, многострадальне Илие, // О стяжании радееши духомирна устройства // Всех лишивыйся, всеми обладаеши, // Огнь премирнен внутрь имый, духопророчествуеши, // Яко готов есмь ко огню

за Христа, // Всесожжением убо Ся Пожершему
о нас // Ся возносиши, яко огненный пророк
жертву о всех, // Духа веянием тонким
прохлаждаешия вечно, // Дерзновения исполнь
о Господе совершенною верою.

Слава, глас 3:

Илие, о Господень трудниче, / Илие, дома
благословенна глава, / Илие, о возлюбленне
пастырю, // присно ходатайствуй о чтущих тя.

И ныне: Богородичен гласа

Вход.

Притчей чтение

Память праведнаго с похвалами, и
благословение Господне на главе его. Блажен
человек, иже обрете премудрость, и смертен,
иже уведет разум. Лучше бо сию куповати,
нежели злата и сребра сокровища. Честнейшая
же есть камней многоценных, все же честное
недостойно ея есть. Долгота бо дней и лета
живота в деснице ея, в шуйце же ея богатство и
слава. От уст ея исходит правда, закон же и
милость на языке носит. Послушайте убо мене, о
чада, честная бо реку, и блажен человек, иже
пути моя сохранит. Исходи бо мои – исходи
живота, и уготовляется хотение от Господа. Сего
ради молю вас и предлагаю мой глас сыновом

человеческим: яко аз, премудрость, устроих совет, и разум и смысл аз призвах. Мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобивии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научу бо вас истине, да будет о Господе надежда ваша, и исполнитесь Духа.

Премудрости Соломони чтение

Праведник аще постигнет скончаться, в покои будет: осудит же праведник умирая, живущия нечестивыя. Узрят бо кончину праведнаго, и не разумеют, что совещаща о нем: яко повержет Господь нечестивыя безгласны ниц, и поколеблет их от оснований, и до последнего исчезнут в болезни, и память их погибнет. Приидут бо в помышление согрешений своих ужасни, и обличит их сопровтив беззакония их. Тогда станет в дерзновении мнозе праведник пред лицом оскорбивших его, и отмечающих труды

его. Видевше же его смятутся страхом многим, и ужаснутся о преславном спасении его. Рекут бо в себе кающиеся, и в тесноте духа воздохнут, и рекут: сей бе, егоже имехом некогда в посмех, и в притчу поношения безумнии. Житие его вменихом неистово, и кончину его безчестну. Како вменися в сынех Божиих, и во святых жребий его есть; убо заблудихом от пути истиннаго, и правды свет не облиста нам, и солнце не возсия нам. Беззаконных исполнихомся стезь и погибели, и ходихом стези непроходны, пути же Господня не разумехом.

Премудрости Соломони чтение

Праведных души в руце Божией, и не прикоснется их мука. Непщевани быша во очесех безумных умерети, и вменися озлобление исход их: и еже от нас шествие сокрушение, они же суть в мире. Ибо пред лицом человеческим, аще и муку приимут, упование их безсмертия исполнено, и в мале наказани бывше, великими благодетельствовани будут, яко Бог искуси я, и обрете их достойны Себе. Яко злато в горниле искуси их, и яко всеплодие жертвенное прият я. И во время посещения их, возсияют, и яко искры по стеблию потекут. Судят языком, и обладают людьми, и воцарится Господь в них во веки. Надеющиеся Нань, разумеют истину, и

вернии в любви пребудут Ему, яко благодать и милость в преподобных Его, и посещение во избранных Его.

На литии стихиры, глас 7:

Болезнующа сердцем пастырским/ об овцах, горце рассеянных,/ давидски стена, изгнанниче,/ се зовещи ко Спасу, о Илие:/ внидоша воды слезныя до души моея,/ да не постыдятся о мне терпящии Тебе, Господи,// ниже да посрамятся ищущии Тебе.

Се лишихся аз, Господи, полусердца ми -/ голубице моя, зрак яви твой,/ - се – младенец хвала Ти мне неслышима есть./ Сам утеши своих ми, Сам хвалою исполнь,/ сих приим стенания, пети Сам отверзи уста:/ яко чудно имя Твое по всей земли,// яко взятся великолепие Твое превыше небес.

Поношения поносящих, Боже, Тебе/ нападоша на мя, раба Твоего,/ воздыхаеши терпеливейше,/ аз же, Спасе, к Тебе молитвою:/ не забуди, услыши мя в милости,// се бо время приспе благоволения Твоего.

Слава, глас тойже:

Се течение совершается,/ Илие, о агнче и пастырю,/ исполняеши дух псалмопением:/ услыши мя, Господи, яко блага милость Твоя,/ поношение претерпех Тебе ради, Святый,/

вонми души моей и избави ю,/ среде горьких работ мир премирнен стяжав,/ не смутихся отнюд, уготовихся сожжещися Ти:// спасение Твое да примет мя.

И ныне, глас тойже:

Разверзающуюся на Руси лихолетию,/ плачем вдов и сирот преисполнену,/ четверицею сирот, сокрушенною вдовицею/ неутешней земли приложися,/ всесожжением взяту, святе, от долувлекущих ти;/ в небе ж Русском звезда возсияла нова есть./ Нам же, светом молитв твоих просвещаемым,/ вложи, отче, в уста покаяния песнь:/ Свят, Свят, Свят еси, Боже Праведне, // Богородицею помилуй нас.

На стиховне стихиры, глас 2,
подобен: «Доме Евфрафов»:

Земле свята, первопрестольная,/ славою отец сияющая,/ плод приими усердна трудника/ славу нову ти слагающа// Илию священномученика.

Праведник, яко финикс процветет:

Церковь Русская,/ новомученик Святая Мати,/ дерзновение возслави,/ чада ти любезнаго:// Илии священномученика.

Насаждени в дому Господни:

Соборе исповедник и мучеников новых,/ земли наша и Церкви злато,/ возблистай талантом

днесь,/ огнеочищенна мирне волею// Илии священномученика.

Слава, глас и подобен тойже:

Николаю светочу всемирну,/ верна бывша на земли служителя,/ покровену Царицею Небесною,/ о народе нове сомолитвенника тем, // Бог являет Илию священномученика.

И ныне, глас тойже: О чудесе новаго...

Тропарь, глас 4:

Благочестием семьи изрядствующую главу,/ Возводящу в горняя по себе чада Божия,/ Огнепальною блистающе ревностию,/ Всесожжение мирно Господеви,/ Злато Церкви преискушенное,/ От сокровищ небесных умоляюща о нас -// Илию священномученика любовию воспоим.

НА УТРЕНИ

По 1-м стихословии седален:

В смирении воспитаи, святей пастырю, терпением утверди, отче, милосердию чада настави твоя, да в вере утвердимся, надеждою окрилены, неложней убо достигнем любве .

Слава и ныне:

Смирения глубоко, терпения крепосте,
Милосердия Мати Чистая,- не презри ны,
непотребныя рабы Твоя.

По 2-м стихословии седален:

Клеветы человеческия и напрасныя смерти
избави ны, отче, яко воистину несть студа
уповающим на молитвы святых, искушенных по
всяческим.

Слава и ныне:

Тобою дерзаем и Тобою хвалимся, Тебе поверяем
беды и скорби наша, яко Покрову премирну и
спасения Ходатаице.

По полиелее седален, гл.2:

Любокнижна ритора,/ устава церковна
ревнителя,/ савваита мысленна,/ страданием
достигша разума совершенна, // огнедохновенна
мученика,/ присно ходатайствующа о нас, //
воспоим Илию о, вернии./

Слава и ныне:

Любочестну Матерь,/ о спасении чад
присноревнующу,/ праведник надежду и
мученик похвалу/, мироходатаицу Мариам// –
превознесем, о вернии/

Прокі́мен, глас 4:
 Прои́дохом сквозе́ о́гнь и во́ду, / и извёл ны еси́ в
 по́кй
 Стих: Разже́гл ны еси́, я́коже разжиза́ется
 серебро́

По Евангелии стихира, глас 6:

Святым иже суть на Руси Святей, /
 новомучеником преславным / удиви Господь
 хотение Свое, / еже Церковь Русскую возродити /
 дерзновенным сих ходатайством; / сего ради о
 уделе своем умоляюще / Илии пречудному
 возопиим: // радуйся, новый
 священномучениче!

Канон, глас 7, егоже краегранесие:
 Благаго иконома и мученика огнеискушенна
 воспеваю Илию.

Песнь 1

Ирмос: Ма́нием Твои́м / на земный о́браз прело́ж
 и́ся, / прё́жде удоборазлива́емое водно́е естество́,
 Го́споди: / те́мже немо́крено пеше́ществовав
 Изра́иль, // поёт Тебе́ пе́снь победную.

Святой священномучениче Илие, моли Бога о
 нас:

Богат сый о милости, Илие, / отверзи смиренныя
 ми уста, / да подвиг твой о Господе славлю, / и
 победную Тому песнь // о тебе пою.

Любоблагочестие отче от пелен наследствуя,/ паки и высокородство матерне,/ отроче Божий Илие,/ дерзновением пред миром// исповедуеши Бога и Царя всех.

Аз брату моему и брат мой мне,/ вопиет от премудра невеста твоя, Илие,/ чистым желанием// в горняя увлекаая тя.

Гефсиманска скита светоч/ и Герасим чудный,/ паки Божия таинник жребия Алексей/ благословением зрят вас яко малую церковь// таже велий подвижничеством дом.

Слава:

Авве Исааку – о писаний того рачение,/ Алексию-старцу – послушание совершенно:/ се же путь непорочен,/ возводяй Илию-трудника на степень священства,// силою Божиею тому яве препоясующуся.

И ныне:

Глас малый прорекла еси/ яко Раба Господня,/ превелию обрела еси благодать/ по глаголу архангелову,/ ныне убо гряди, Избранная,// да родиши Избавльшаго нас от клятвы.

Песнь 3

Ирмос: В нача́ле небеса́/ всеси́льным Сло́вом Твои́м утвержде́й, Го́споди Спа́се,/ и вседе́тельным и Бо́жиим Ду́хом всю́ си́лу их, //

на недви́жимем мя́ ка́мени испове́дания Твоего́
утверди́.

О утешении малодушных тцание твое,/ о
немо́щных заступлении преусердие:/ о всех
долготерпиши,/ добрый о служителю Троицы,//
от зачала пресвитерска ти, святче, подвига.

Испытание досязает тя со присными, Илие,/
токмо зачинающуся лихолетию,/ богадельну
дому горце заключаему,/ но и во гладе хлеба
упование не скудеет вам,// от словес
питающимся Божиих и святых отец.

Кирилла смиренна о житии и имени,/ осеняеши
благословением, Илие,/ среде бурь
мирских тихую обретаеши гавань,/ кормило
нова ти корабля крепостию держа,/ Николы
Милостива и Пречистыя// утверждаяся
молитвами.

Обвеян молитвою Алексия-старца,/ Духосошествен
храм яко толмача Божия сретае
тя, Илие,/ глаголы святых отец изъясняюща,/ о
благодати нову привлекающа паству,//
неустанным ю воспитуя служением.

Слава:

Неззорну супругу обрет, отче Илие,/ яко мать
чадолюбиву лицезриши ю,/ паки и соработницу
ти о Господе,/ да ведением и чувством/
благолепия служб церковных/ на молитву
соподвизаете// люди Божия присно.

И ныне:

О Всепомощнице Пречистая,/ клятву разрешити
Адамову,/ слезы же Евины утолити/ грядеши в
Вифлеем,/ паки немотство греха уставити//
славословящих Человеколюбца.

Седален, гл.2:

Бутырок лютых сугубое прошед поприще, Илие,/
трегубыми дары любви о смиренномудрии
обогатился еси,/ се же поминай пред
Господем// возлюбивших тя,
священнострадальче.

Слава и ныне:

Священников доброто и мучеников похвало,/
Покрове миру всему, Богородице,// чад земных
не остави, Мати Небесная.

Песнь 4

Ирмос: О́тча не́дра не оста́вь,/ и соше́д на
зе́млю, Христе́ Бо́же,/ та́йну услы́шах смотре́ния
Твоего́,// и просла́вих Тя́, Еди́не Человеколю́бче.
Многими словесы ты воспети дерзнувшим,/
обаче скоро оскудевающим,/ от елея богомудрых
твоих глагол, о Илие,// нам восполни
свещильницы.

Алексию прелюбезну ти наставнику/ слово
хвалы простираеши, Илие,/ триедину воспевая

старца благодать, // юже в мудрости и любви со смирением зриши.

И нраву быти причастником, / и о подвиге праведником уподобиться / - се - и ныне возможно есть / - тако возглашаеши, Илие, / паки слово дерзновенное печатлеши // непорочным житием.

Мертва без дел по апостолу вера есть, / темже возставляеши, Илие, / грехолюбием успнувшия, / от огня твоего воспламеняя в сердцах // искры Божия.

Слава:

Удаление ся от Таин Святых / грехолюбныя ради нечистоты, / яко богопротивну дерзость обличаеши, Илие, / се бо опытно свидетельствуеши, / яко покаянием исполненным житием // водворяется в сердце Господь.

И ныне:

Чистая Мати Всепетая, / вся верныя собираеши, / иже от простых и премудрых, / в Вифлеем песнопети Тя, / Сыну же Богокрасному звати //: слава силе Твоей, Господи!

Песнь 5

Ирмос: Но́щь не́светла́ неvéрным, Христе́, / véрным же просвещéние в сла́дости словéс

Твои́х./ Сего́ ра́ди к Тебе́ у́треннюю, // и
воспева́ю Твое́ Божество́.

Единение исповеди с покаянием/
проповедуеши, Илие мудре,/ да наси́лия греха
избегнем,/ да одея́ние души о церковнем
измы́вше таинстве/, чистото́ю облечемся//
жизни новы́я о Христе.

Не нужде́ю привлекает к Себе Госпо́дь,/ не
наси́льством горьким,/ но тонко души касаясь/
паки словом утвержда́я жизни,/ умилением
исполняет свобо́ден дух:// тайнозриши сия, о
Илие, и свиде́тельствуеши.

И о бедах, и о соблазнах лю́тых,/ и о всех
благодарение, де́я и уча,/ Спасу возноси́ши, о
Златоусте но́вый Илие:/ возлагаеши вся в руце
Божии, // блаже́нство в оных обрета́я истинно.

К памяти Божией зовеши верны́я/ словом
Феофа́на святи́теля, Илие,/ вся грехи́ яко́ сучцы
вменяеши евангельски// пред бревнопо́добным
осу́ждением.

Слава:

Аще любите́ Мя слово́ Мое́ соблю́дите/ – си́це
Госпо́дь учит,/ паки и Или́я о дражайшем
Христу́ ревну́ет,/ любви́ю зовя́ Тому́,/ еже́ Ти
да приведу́, Спасе, // ихже́ дал ми еси́.

И ны́не:

О сми́рения богопо́добна!/ О чистоты́, о любви́,
Дево-Мати!/ Ны́не к Вифле́ему нас ра́ди

тщишися,/ красно родити Отроча// и Бога превечна!

Песнь 6

Ирмос: Плавающего в молве житейских попечений,/ с кораблем потопляема грехи/ и душетленному зверю приметаема,/ яко Иона, Христе, вопию Ти:// из смертоносныя глубины возведи мя.

Гласу совести яко Божию/ внимати не возжелехом,/ яко жизни изменения страшимся,/ сего ради от уныния горька возстати несильны есмы,/ но да воспрянем желанием,/ слову твоему огнеобличительну, Илие,// внимающе.

Небес притвор, сиречь земна юдоль,/ приемлет всякою немощию духовною обложенных,/ якоже древле Вифезда-купель./ Сего ради да уготовимся к сретению Царя Небесна,/ немощи наша Тому исповедающе,// слову твоему, святе Илие, внимающе.

Еда дреманием содержим есть Господь,/ внегда скорбети нам, обуреваемым отчаянием/ – ни, никакоже!/- отвечаеши опытом, Илие,/ духа бодростию ко Христу/ - в сердцевине бури стоящу// - путь указуя всем.

Исполнен разума духовна сый,/ слова благодатию облистан, Илие,/ яко некий талант,

ввергаеши сия в сердца верных ти/, из нихже,
яко благой сокровищницы,/ плоды извлекаеши
духа,// иже есть любви и радость и мир, по
апостолу.

Слава:

Самоотвержения правило,/ душепопечения
образ,/ всякою пастырскою добродетелию
украшена/ чисте зрит тя благодарная, Илие,
паства твоя/ – се блаженный Божию иконому
итог,// се же к высшему звание подвигу.

И ныне:

Камо идеша, Чистая?/ Чесо ради течение
совершаеши?/ Сына родити Превечна гряду в
Вифлеем,// да клятвы избавит Адама с
праматерию.

Кондак, гл.6:

Пастыря всеизрядна Толмачевска,/ Бутырска
благосердна узника,/ терпеливодушна
изгнанника за Христа,/ мирнаго духом
мученика,/ Илию восхвалим// неусыпающа о
нас ходатая.

Икос:

Кто, достохвальне Илие ,/ изречет труды твоя и
болезни,/ яко и среде утеснений лютых/ о
служении Божиим усердствуеши,/ паству к
истинному житию во Христе воздвизаеши,/

первее словом уча,/ по изгнании же крайним
терпением наказуя,/ и тако дух мирен стяжал
еси, отче святыи,/ во всесожжение ся принес,/
вселябозных ти небесных высот достигл еси./
Сего ради сыновне любовию восхваляем тя,//
яко неусыпающа о нас ходатая.

Песнь 7

Ирмос: Пещь отроцы огнепальну/ древле
росоточашу показаша,/ Единого Бога
воспевающе, и глаголюще:// превозносимый
отцев Бог и препрославлен.

Уязвлен молитвою Спасовою ко Отцу,/ на себе
сбывшееся слово зриши Евангелия,/ се бо
поистине прославль Господа на земли,/ о
сродных по духу пред Ним присно печалуюся,/
паче к Тому грядя мироизгнанием, Илие,// от
близости крайней Сего, умолкаеши.

Шлем спасения восприим, Илие,/ вооружен
мечем слова Божия,/ несмущением
благословляеши си заклепы темничныя,/ яко и
на горшая уготовлен еси,// духа доблестию, о
Христов войне.

Егоже возлюбил еси,/ Егоже возжелел еси,/
трепетом души, о изгнанниче/ Того ради и тело
неневолию изнуряеши,/ се – до Пермских лесов
пешешествует мирне раб// крестным путем
Владыки.

Неясыти пустынной подобяся,/ плачем о
присных ти растворяеши питие,/ ся готовый о
чадах уязвити самозабвением, о Илие, // вся
обаче поверяеши Изъязвлену о нас.

Слава:

Не о присных ти токмо богоутешении,/ ниже о
литургисании радостотворне,/ но среде горьких
работ/ славу Христу возносиши истощанием о
всех,/ сему же свидетельница ти дражайшая// –
яко голубина почта.

И ныне:

Аннина яже от неплодства Дщерь/ чревоносит
ныне Безсеменно Рождество, // - взиграйте,
людие, песнопойюще.

Песнь 8

Ирмос: Неопальная огню в Синаи причащаяся
купина,/ Бога яви медленноязычному и
гугнивому Моисеови,/ и отроки ревность Божия
три непреоборимыя во огни певцы показа:/ вся
дела Господня Господа пойте, // и превозносите
Его во вся веки.

Взысках тя брате мой - не обретаю тя,/ -
голубица со птенцы болезнует, -/ Ангел твой да
хранит тя, благослови нас/ - вся терпети ми
нелевозможно есть, // не довлеет токмо
лицезрети тя.

О любезная ми, о голубице моя!/ Аще волю
воздохнул бы есмь о мгновении,/ вся бы думы
мои возлетеша до вас./ Вся терпети ми
нелевозможно есть:// не довлеет токмо
лицезрети тя.

Се же вижду тя, брате, - слава Богу о всех,-/
истязания ти неизвестны ми есть./ Слава Богу
о всех,- отвечаю ти,/ - о сестро-голубице, мир
храни: се Господь есть близ./ Се же вкупе
речем:// слава Богу о всех!

Пламенея серафимски духом,/ лютый утоляеши
мраз, о Илие чудне,/ устройением миродушевым
сретая огонь,// возносяй до Солнца тя правды.

Благословим:

Еже жити Христос ти бысть, Илие,/ темже
смерть духопламенна ти есть приобретение,/ да
вселишися, идеже Жизнь жительствоует,/ со
Златоустом воспевая вечно// славу Богу о всех!

И ныне:

Велий Господь наш,/ и велие Твое дерзновение к
Нему, о Мати,/ брэнная нам отверзи уста,/ да
благословим Раждаема// и превозносим Его во
веки вся.

Песнь 9

Ирмос: Не,тлѣнія искушѣніем рѣждшая,/ и Все
хитрецу Сло́ву плоть взаимода́вшая,/ Ма́ти
неискусомужная Де́во Богоро́дице,/ Приятелище

Нестерпимаго,/ Селó Невместимаго Зиждителя
Твоего,/ Тя велича́ем.

Алексиева духа наследниче,/ среде мира соблазн
руководствуй ны,/ да Божественныя не
лишимся десныя страны,// Илие, о печальниче
наш.

Юность настави правдою,/ зрелость
ревнованием утверди,/ старость утеши о
Господе,// Илие, о ходатаю наш.

Иисусов светлообразен Лик,/ кистию описавый
трепетною,/ да в сердцах яснопечатлется
той,// любоискусне Илие, новый светочу наш.

Любящих тя помяни,/ уповающих на тя не
забуди,/ просвети же всех словом правды и
милости,// да последуем Господу по стопам
святых.

Слава:

Имя славно твое, светло житие/ – прости
убожество словес,/ духа восполни оскудение,//
Илие святе отче наш.

И ныне:

Юница Божия/ о страдании стенет
новомученик,/ паче же ликует о небесней тех
славе,// яко Мати сущи Господня.

Светилен:

Светом богоразумия возблиставый/ в житии и
слове, Илие пречудне,/ омраченныя наша озари
сердца,/ / умоляя присно Животворящаго Духа

Слава и ныне:

Се раба Господня,/ - рекла еси ко Архангелу,
Чистая,/ - и мене сим смирением просвети// -
снисхождением Духа.

На хвалитех – стихиры 4, глас 5,
подобен: «Радуйся»:

Радуйся, Илие, имя издревле славное,/
Подражавый небесному ти покровителю/
Ревностию святою о богопознании,/ Паки
неослабевающим усердием/ О возрастании в
опытном смирении/ Паствы ти поистине
возлюбленной,/ Юже, в подражании великому
Минятию,/ Укреплял еси среди гонений
лютых// Словом пламенновдохновенным./
Радуйся Илие, святых воспитание,/ Благодать
стяжавый верна ученичества,/ Слово
преподобных всемудрое/ Крайним ти
вниманием усвоивый,/ Сего ради рассуждение
духовное/ Святоунаследив, пастырством
явивый,/ Паки дар сей многоусугубивый,/
Исполняя слово разумом высокое// Житием
пламенновдохновенным.

Радуйся, Илие, исповедников друже и мучеников,/ О житии Исаака-свята соработниче Михаилу дивному,/ Приемый благословение нововсельну дому твоему/ От Николая будуща святителя Казахстанска,/ Звздоименну же Серафиму соблистай премудростию,/ Маккавеевску Александру тайны воскресения проповеданием,/ Любвию устава церковна Сергию, иже от Никитников,/ Паки Игнатию священнострадальцу единою ревностию,// Иже к подвигу влечет пламенновдохновенну.

Хвалите Его в кимвалех доброголасных, хвалите Радуйся, Илие, винограда Господня трудниче,/ Отребивый терны миролюбия,/ Землю благу сердца тихослезно орошая,/ Яко плод сториичный духа возрастанием/ Преимуш всяк ум стяжал еси мир Христов,/ Восприим же сей хлада тонка глас,/ Серафимски возгараяся любовию премирною,/ Совершенно всесожжегся еси Господеви// О исходе ти пламенновдохновенне.

Слава, глас 8:

Страдание есть богатение души,/ утешение же – трата,/ - сие премудрая ти супруга рече,// - о, Илие, смиреннопроведниче Христов, восхотевый доли последнейшия, яко райских цветов навоз вменивый ся, обрелся еси светочем

ясным, солнцезрачне сияющим в Царстве Отца
ти Небеснаго.

И ныне, глас тойже:

Владычице, приими молитвы раб Твоих, и
избави нас от всякия нужды и печали.

